

居  
易  
堂  
集

序

聖人立教首言文行而文必先乎行者以行必於文焉見之也何也六經聖人之文也然舍六經則無以見聖人之道下及諸子百家千岐萬彙爲文不同然於以抒其蓄積聚其生平則無不同所以有聖人賢人即有聖人賢人之文有忠臣孝子即有忠臣孝子之文誠積於中而形於言是有所不得已者如唐虞之所吁俞伊周之所訓誥鄒魯洙泗之所稱說以至伯夷采薇之歌屈原懷沙之篇伯奇履霜之操竝懸日月同敝天壤使千古而下讀其書如見其人如聞其聲爲之或泣或歌流連而不能已是皆文之用也

嗚呼難言之矣非身之所履心之所之畢世不移之  
死靡二其誠可以貫金石泣鬼神則未可以語於此  
也余不佞痛遭家國之變時年二十四先學士文靖  
公死節報國余誓必從死死志未遂苟存於時於是  
束身土室與世訣絕時即碌碌苟安無所齟齬而傷  
心之悲終天之痛慘灼酷烈鮮民之生不如死之久  
矣而况世變至今四十年中崩天之敵稽天之波彌  
天之網靡所不加靡所不逮而再益之以饑寒之凜  
慄風雨之漂搖世事之詿誤骨肉之畸軀靡所不累  
靡所不極嗚呼亦可痛矣余不佞真千古之窮人而  
無告者也而爲時之久已四十年而吾之心未嘗有

豪釐之移未嘗有須臾之間於是吾之心亦遂得灼然爲海內所諒而此四十年中前二十年不入城市後二十年不出戶庭故凡交游之往復故舊之懷思風景之流連今昔之感傷陵谷之憑弔以至一話一言之所及一思一慮之所之非筆之於書則無以達之故危苦悲哀之辭悵鬱侘傺之思質言而長言者不覺層見而疊出嗚呼余之不文文固不足以傳而吾之心則可以俯仰千百世而無愧故歷四十年之所積不可以泯也於是別其體類定其義例錄成若干卷名之曰侯齋文集後之覽者見吾之文因以見吾之心之所存乎嗚呼有聖人賢人即有聖人賢人

之文有忠臣孝子即有忠臣孝子之文若余不佞千古之窮人而無告者斯以爲窮人之文其可矣甲子新秋日秦餘山人侯齋徐枋自題

凡例十一則

文章重體類書曰辭尚體要易曰方以類聚既有體斯有類矣自古編輯之家綦重之苟體之不分則類於何有然此猶就其疑似豪釐之間言之猶五穀皆穀也而菽麥不可不辨五金皆金也而鉛錫不可淆於黃金耳若直非其類而訛舛淆襍則吾不能知之矣如昌黎一集文章家之龜鑑也又爲其受業門人李漢所編不知何以於文之體類既有所訛即於其自爲書之例又有所戾如谿堂古詩何以入襍著石鼎聯句何以入序中送陸欽州送鄭十較理送張道士

祇應以序入詩中不應以詩附序見况送張道士序僅數言而其詩則鉅篇也而竟入序中此皆於文之體類有未叶者也為宰相賀白龜狀在三十八卷表狀中何以賀張徐州白兔狀又入十五卷書啓中此皆於其自為書之例有相戾者也今吾集凡為詩為辭為贊之序不問其長短詳畧俱見之詩與辭贊中不別見至似是非非相近而遠如說論議之體裁迥別書後與題跋之各有家數劃然不紊也

文籍重編次編次者前後是也集之居前者大約須觀其全集之次惟其所重以其文之多而有

關係者爲首列斯爲得體今人文集動以賦與詩居首此遵文選例也不知文選固辭家之書其所重在辭賦耳未可概論李漢編昌黎集亦然甚非謂也今拙集以書居首蓋此集中惟書爲最多以吾四十年土室四方知交問訊辨論一寓於書且吾自二十四歲而遵世變與今之當事者謝絕往還諸書及答一二鉅公論出處之宜諸書似一生之微尚係焉伏讀往冊如叔向貽子產書於古文中亦惟書爲早出故吾集以書冠之而尺牘次之者從書而類推之也尺牘原本於書而自爲一體非以辭之長短而云



故有極短者而仍入書中取歐蘇集別載小簡  
例別爲一卷

書法重義例既操筆爲文必有其義義之所在例  
之所起也如吾四十年往還諸書俱不得已而  
應非泛泛寒暄應酬之比無論吾諸書或非無  
係於世者即吾之稱謂標題各有一定書法如  
吾先公執友最嚴重者則既書其官復書先生  
等而殺之或稱官或稱先生不竝書而係之其  
字若朋儕往還或止書官或竟書其字也集中  
諸傳例書其人之字傳本創自史記史記或書  
名或書字或書爵里以無定爲例蓋太史公即

寓書法於其中也自漢書後槩書名末學不察  
嘗以古文必書名為古嘗有於極無謂文字中  
硬入人之姓名以為得古人之法良可笑也況  
文章自有家數非可意造古來惟昭明文選載  
古人詩文多書其人之字深得太史公遺意亦  
可見古人不欲輕用人名也近有所謂名士者  
一於中外子姓以猥瑣之事而於尊行鉅公直  
斥其名一於長物瑣語而必書友人之名一於  
友人寓言小傳中諱本人之名而旁及他友則  
直書其名吾心竊鄙之憎之吾嘗言文章果佳  
即不書名不失其為古文苟非文章則雖鈔襲

謨誥之語猶為無當况僅僅一書人之名耶吾  
今所作傳有鑒於此且既非國史不敢猥書人  
名竊取管仲屈原周文張叔諸傳以為例概以  
字稱覽者當自得之惟朱先生沈徵君二傳則  
特筆也其敬亭山人傳畧則以其題其文皆屬  
為筆削者不在此例

諸文各以類次及之其文少而不能自為一類自  
為一卷者則隨類編入如議辨附記說之後頌  
銘附於贊後是也

余自二十四歲而遭世變即與世決絕長往不返  
其真隱之志頗為海內所諒則凡作為文章亦

非吾意也其辭之不得而應辭者嘗過半應者止什四而至於碑版傳誌之文則辭者嘗什九應者止什一然所應者又皆吾所欲爲即不請或感激鼓舞以屬之筆墨者然後爲之若違心從事僅僅諛墓則百無一焉然所謂應者什四猶就人之見請者而言耳若合計全集凡爲文八百餘篇多吾之發於心而不能已於言者應人之請亦僅可什一矣

生平無似然讀書作文一字一句必心有真見有獨得然後發之既不敢附和蹈襲亦不敢標奇好異若體裁義例則必依據古人其或吾之所

見有灼然自信者亦竟發古人所未發以信之  
千古此又在覽者之自得之當不評其爲師心  
也

書後題跋分爲二類亦猶書與尺牘也書後必於  
其事有所論列或發古人所未發或因其事而  
別論他事非僅僅片辭隻語取意於字句閒者  
如昌黎書張中丞傳後是也題跋則有間矣識  
者閱吾諸篇則劃然二體自不可合爲一者  
偶以書畫尚論古人故題跋頗夥要於其中自有  
獨見然後出之四十年土室閉門却掃不惟古  
人名蹟不能多得寓目即當世賢豪品題書畫

收藏精鑒者亦不得與把臂細論則未知吾所見果有當於藝林否也然惟欲存吾之所謂獨見以是正於知者故亦附錄之

有韻之文閒一爲之吾不敢以自許也正如子瞻所云如候蟲時鳥自鳴自止而已既已爲之亦存於集亦以時會寄託有不可沒者耳今亦以類編之自賦而詩而辭而贊而頌而銘皆有韻之文也凡爲八卷昔柳州集以詩居末子厚詩居然升作者之堂子瞻晚年喜讀之稱爲海外三友則其詩可知而以殿其集者子厚固以詩爲一集之後勁而余則以詩爲一集之附庸也

每見古人於孤臣寡婦朝吟夜怨一言一句哀而錄之吾之不刪吾詩即此意也惟覽者之傷其心而不鄙其辭可耳

昌黎集自賦與詩之外首列襍著則以文之不多而有關係者入之如原道獲麟以及諍臣論諸篇而以遊戲寓言諸文名為襍文吾不敢謂然今仍分爲二類而以文之無所附麗不能成卷者爲雜文以遊戲寓言者爲襍著一以殿諸文一以殿有韻者襍文襍著名則取諸古人而義則出之自我偶然有見也

古人之不以文章名而其文章自不腐於世者多

矣如陳壽編諸葛武侯集二十四篇凡十萬四千一百一十二言謂公誠之心形於文墨子瞻序范文正公文謂其于仁義禮樂忠信孝悌如饑渴之於飲食欲須臾忘而不可得如火之熱如水之濕蓋其天性有不得不然者嗟乎文章而出於心性此其所以不腐於世也吾之文固非古人之文而吾之心則古人之心也實竊有自信者故文雖不足存而謹錄之不特欲以遺之子孫寔欲以質之千古焉

時甲子秋七月初六日秦餘山人侯齋氏又識



居易堂集目錄

長洲徐枋侯齋著

門人潘耒編校

孫男徐庠繕錄

卷之一

書

答蘇松兵備王

之晉書

答長洲縣知縣田

之本沛書

答吳縣知縣汪

煥南書

答陳給諫臥子先生書

致楊解元維斗先生書

答楊解元維斗先生書

與胡其章給諫書

與欽遵一書

答吳憲副源長先生書

與徐禎啓書

答房師姜弱菴先生書

與武部李霜回使君書

與閩族書

與楊明遠書

與楊明遠書

與葛瑞五書

與潘生次耕書

與時次其書

答惠生而行書

卷之二

書

與葛瑞五書

答宮保張大司農書

答靈巖老和尚書

與堯峰月涵和尚書

與天善開士書

答惲孫菴書

答友人書

與朱致一書

答退翁老和尚書

與堯峰月涵和尚書

與寶安去息和尚書

與葛瑞五書

與靈巖曇應和尚書

與王雙白書

與王生書

與朱致一書

卷之三

書

致巢孝廉端明書

答節公書

與葛瑞五書

與友人書

與宋生大樵書

與休寧汪文儀書

與吳子佩遠書

與馮生書

與王生書

與吳瓶菴書

與仲甥吳漢書

答業師沈伯敘先生書

答寧都魏凝叔書

致闔族書

與葛瑞五朱致一書

與姜奉世書

與曾青藜書

與楊震百書

卷之四

書

誠子書

尺牘

答業師鄭士敬先生

答友人

與袁公白先生

與葛瑞五

致靈巖老和尚

與友人

與古民上人

答瑞五

又

答周玉鳧儀部

與古民

答吳子佩遠

又

答老和尚

東瑞五

致華山和尚藥翁

與支山和尚

與筇在

答筇公

又

又

與王隻白

致老和尚

東歸玄恭

與惠而行

與愍堃上人

與雪公

答玄恭

與葛瑞五

與二弟貫時

與楊明遠

與葛瑞五

答楊明遠

與周牧寧

卷之五

序

通鑑紀事類聚序

建元同文錄序

讀史釋語序

讀史雜鈔序

管見序

鄭業師雲遊詩序

靈巖樹泉集序

周玉鳬儀部讀史詩序

醫家炯戒序

欽子遠猷畫解序

靈巖報慈圖序

故侍御秦大音先生遺筆序

休寧何氏世譜序

前星野語序

惠而行詩草序

姜如農給諫畫像序

宛山顧氏家乘序

鳳棲李吳氏家乘序

卷之六

序

贈業師鄭士敬先生序

贈兜菴序

送去息和尚住夫椒祥符寺序

贈李秋孫序

送磷雪上人行脚序

贈新安汪惟晦隱君序

吳子自號瓶菴序

外祖母王太夫人九十伯舅吳明初先生七十

壽序

葉太師母八十壽序 楊隱君曰補六十壽序

萬峰剖石和尚六十壽序

吳母徐太夫人八十壽序

朱師母六十壽序

卷之七



序

布衣張蒼睂六十壽序

靈巖老和尚六十壽序

五牧劬圓和尚六十壽序

高母馬太夫人七十壽序

張徵君德仲先生七十壽序

鄭老師桐菴先生七十壽序

李侍御灌谿先生七十壽序

潘母吳太君五十壽序

嘉禾處士徐九巖五十壽序

楊處士明遠六十壽序

法林菴凌雪禪師四十壽序

從嫂蔡太君七十壽序

玄墓知浴禪師募齋序

法林菴募造大悲香像序

僧性行募建佛殿序 白龍寺募鑿池救田序

法林禪士募衣鉢序 法林菴募製莊嚴序

卷之八

記

吳氏鄧尉山居記 芥舟飲酒記

病中度歲記 再生記

箬廬記 顧氏松風寢記

甲寅重九登高記

鄧尉十景記

虎山橋

司徒廟

銅坑

銅井

石壁

槎山

七十二峰閣

西灣

勸上

玄墓

鄧尉畫冊復還記

思樂亭記

卷之九

論

封建論上

封建論下

井田論

吳王闔廬論

范蠡論

俠士論

刺客論

荆軻論上

荆軻論下

師說上

師說下

寒花說

貧病說

宋生名字說

恒軒說

故給諫東萊姜公琛私謚貞毅先生議

春王正月辨

卷之十

書後

書平準書後

偶書侯羸事後

書李斯傳後

書諸葛武侯傳後

書張噪事後

書傳伏事後

書沈客卿施文慶事後

書五王反正中宗後  
書韓愈對禹問後

書昌黎潮州謝表後  
書柳宗元封建論後

書蘇轍燕論後  
書蘇轍三國論後

書先文靖公墨刻後  
贈靈巖老和尚

書璜溪陳烈婦楊氏行狀後

書王咸中乞臨曹娥碑後

書周忠介公墨刻後

書殷汝劼先生私謚議後

書鐔津集評讓篇後 書周氏李孝婦卷後

書石刻姜如須遺蹟後

書鷓鴣賦圖卷後

書李氏收藏黃孝子畫蹟後

書三聖圖後

書芸齋周先生復仇血疏後

敬書先六世祖大中丞公貴人歎後

卷之十一

題跋

題倪文正公尺牘後 偏題友人畫梅

題邵僧彌墨菊

題唐伯虎先生畫像

題七姬墓誌銘

臨石田四景跋

題竹石贈方南明六十

題楊曰補畫冊

題畫芝

又

題山東董樵谷樵隱圖

題歸元恭小像

題華藏菴迎翠圖

題畫芝

題俞禹聞先生畫

題畫芝

又

題畫

題畫芝

又

題畫

題畫芝

題畫冊贈張默全

題畫芝

又

題秋林落木圖

題畫狗

題畫芝

題蓮不菴

題黃孝子端木畫

題沈貞隱士遺墨後

題畫冊

題畫

題畫

寶華大律師見月老和尚小影題語

題畫

題畫

題俞禹聞畫

題芝蘭松栢

題畫

題畫

題畫芝

畫冊跋語



題宛山顧氏家藏聖教序

題畫蕉

題書

題顧尊實收藏黃孝子真蹟

題畫

題芝蘭卷

題集古錄唐昭懿公主碑跋尾

題碓菴和尚效寒山詩

題畫

題彷彿雲林畫

題畫冊十二則

題二誌二傳

卷之十二

傳

朱先生傳

沈徵君傳

楊伯雨傳

楊無補傳

姜如須傳

張英甫傳

葛瑞五傳

貞孝聞氏傳

周氏全孝傳

汪節婦黃碩人傳

卷之十三

誌銘

明故正治上卿資政大夫太子少保南京吏部

尚書贈太子太保謚安節袁公墓誌銘

明故資治尹嘉議大夫禮部右侍郎兼東閣大

學士贈禮部左侍郎謚文肅文公墓誌銘

明故文林郎四川道監察御史吳公墓誌銘

奉直大夫吏部驗封司員外郎華公暨元配談  
宜人合葬墓誌銘

奉政大夫分巡登萊道按察司僉事沈公墓誌  
銘

卷之十四

誌銘

處士次其時先生暨元配徐孺人合葬墓誌銘  
朱處士繼配周碩人墓誌銘

王節婦黃碩人墓誌銘

處士獻其胡君墓誌銘

吳文學徐碩人合葬墓誌銘

吳子墓誌銘

吳子元配徐碩人墓誌銘

塔銘

報國大律師茂林祇和尚暨戒幢易律師同律

師三代塔銘

穹窿擴南宏大師塔銘

卷之十五

塔銘

獅林廣運大師智公塔銘

五牧德慶琚和尚塔銘

法林水觀禪師航公塔銘

再生道人塔銘

頤浩子山和尚壽塔銘

碑銘

萬峰聖恩禪寺重建大法堂碑

南嶽儲和尚報慈室碑

法林菴迥塵淨公道行碑

雜文

書成告家廟文

書故仁壽令殉節顧公逸事

告家廟文

告張碩人文

卷之十六

賦

主藥神賦

鷓鴣賦

張公賦

卷之十七

古體詩

送遠詩十一首

別詩六首

懷人詩九首

靈巖

遠人

月老

髯叟

致一

聞公

瑞五

明遠

玄坦

五君子哀詩

故給諫陳公子龍

故文學葉先生襄

故隱君楊叟補

故吏部姜君垓

故處士鄭君之洪

題畫芝贈方南明

題落木菴贈徐元歎

箬廬詩贈趙封初

贈五牧劭和尚省墓詩

長兒孟然三十貽以畫幅書此勗之

題孤楫萍江圖

送遠詩三十韻

壽宗子瞻明六十初度得五百字

題硃硯

送別支山和尚

題畫芝五首

題畫木瓜

題畫襍詠四首

春夏襟感

壽楊震百五十

贈西山橋香同和尚時五十初度

簡葛瑞五

鄧尉山多桂家舅吳明初先生山居之右尤盛

食蟹歌

鳳凰行

長歌壽黃萊民六十 采芝歌

七十二潭歌贈同年陳言夏再訂入山

題石田墨梅

題王勤中花蝶圖

病中放歌



懷舊篇長句一千四十字

卷之十八

今體詩

晤含光法師

過宗子瞻明一雲山居

覺螺菴同姜如須分韻二首

集舅氏吳明初先生鄧尉山齋

試夾石泉

喜見季甥

即事

風雨中素菴見過竟日

憶別季甥有懷

顧爾音招過得閒亭吃楊梅畱飲竟日即事

梁谿張方來賣藥山中

山居抱病張方來以藥起之復見貽長生酒

食園筍

經月雨濕友人見貽名香喜而有作

過明上人華藏菴

送筇在師越游三首筇公爲余作澗上草堂賦

梵林師賦詩見訪索和依韻酬之

贈別友人李君

朱致一過山齋依韻答贈

同胡其章給諫鄧尉看梅謁剖老和尚步韻

春日寄居僧寮

同陳言夏集徐次洲山樓看梅分得絲字三首

五月五日讌樂志堂卜居

西堰

所思

舟行堰中即事

有客

帳望三首

塞上二首

湖中山寺

壽周茂蘆六十

次韻題王氏鄧尉山居

贈張默全

次韻贈筇公

壽家舅氏五十初度

重過治平寺次先中丞公原韻

壽華山藥翁和尚七十初度四十韻

贈葛瑞五五十初度兼稱雙壽三十韻

奉贈李侍御灌溪先生五十韻

奉贈周儀部玉鳧先生五十韻

懷友二首

題畫

老人騎牛

題畫即事二首

題畫

題畫八首

題畫卷

贈碓菴和尚繼席靈巖三首

贈曇應和尚住古堯峰二首

題畫松二首

題畫四首

題畫

題畫二首

題畫

卷之十九

辭

姜吏部如須哀辭

退翁老人南嶽和尚哀辭

李侍御灌谿先生哀辭

老友蒼厓張君哀辭

贊

莊子贊

漢壽亭侯贊

觀音大士十贊

移居十景圖贊

霸陵山

土黨

方城

桐廬

衡山

會稽南山

積金澗

北渚

箕山

岐亭

宗子炯太君王氏遺像贊

鄭青山泛舟小像贊 楊曰補小像贊

吳佩遠琴書小像贊 獅林廣運大師遺像贊

故宮保張大司農遺像贊

吳江周長生畫像贊 張蒼眉畫像贊

徐次洲畫像贊 薛逸菴畫像贊

題瞻明宗子居士像贊

業師鄭桐菴先生畫像贊

故贈大理安甫陸公遺像贊

元鎮東儒學提舉朱澤民先生鏡容贊

卷之二十

頌

蘭白華頌

銘

書函銘

竹杖銘

雜著

討蟻蝨檄

劾鼠文

絡野篇

醉言

難客

書示馬生

試墨

自疾後五戒

論文雜語

論文雜語

論詩雜語

居易堂集目錄終



居易堂集卷之一

書

答蘇松兵備王

之晉書附來書

待罪名邦託居仙圃敬仰先賢大節遠挹主人高風擬直造墓廬一  
申瞻企自愧塵鞅碌碌迷致策之不前茲者投劾以去又復刺促遄  
歸晤對光儀竟成大事矣惟是久託萬間之茫而未獻一芹慚悚盈  
襟無可自追聊具衰絺少展寸忱非敢云實撫之資也輒惟笑其  
荷偶有鶴一隻欲將去不知肯相隨否如其  
不羈或當留爲山池之玩也臨敬

孤哀子徐枋稽顙拜痛自先人東身殯節捐棄藐孤  
而藐孤不肖不能從死偷生苟活致毀體辱親誠爲  
兩間之罪人抑亦名教之罪人矣病毀交摧生理已  
絕呻吟苦塊跼伏隴丘如是者半年於茲而卒未能  
一刻強起致人間世事一枕都廢昨者小伴自賊至

荒塋忽傳翰教存及藐孤而九死餘魂一絲僅繫未  
能拜既完璧以歸知執事當不以世法苛垂死之人  
而罪其不恭也至一畝之宮荒榛可掬何足以駐使  
節哉伏枕支離口占奉報不知所云

答長洲縣知縣田

本沛書 附來書

恭惟老先生鴻飛冥冥天際人也弟心切譴荆而風塵面目自愧不  
堪登碩人門謹此修候與居以誌懿德之好昨面按臺處大人對弟  
輩樞道老先生之高心切儀之老先生何吝一見定有爲  
台臺處之最當者也俗冗中不盡欲陳尚容匍匐晉謁

孤哀子徐枋稽顙拜先人畢節止水捐棄藐孤而藐  
孤不類不能相從九京偷生草土誠爲千古之罪人  
矣然自遭大故慙恨痛毀并集方寸致百病交攻沉  
疴莫起今雖視息尚存而生理已絕經年伏臥雞骨

支苦身不勝衣口絕糧粥餘氣游魂百事盡廢所欠  
惟一死耳執事試思鮮民之生也如此而尚能扶之  
而起令入世法乎且熒熒倚廬昕夕總帳之側形影  
相竝跬步不踰古人事亾如存或有取爾也執事倘  
以禮教民當亦弗強之使出耳是用不能勉承台旨  
扶掖樞趨設罇有齒及藐孤者并祈執事善爲我辭  
代陳病困俾得洞鑒藐孤垂死苦狀則執事之所造  
不淺矣伏枕口占倩筆布悃不知所云

答吳縣知縣汪

端南書 附來書

台兄以高華之哲發瓊英之門弟聞風相思實於徐子風繁聲情既  
復從牛鶴老得悉公臺素履意氣干雲風雅應世不減當年南州高  
士未及握手殊云耿耿因念十餘年前弟難窓風雨雅尊翁先生張  
篇是佩誼猶私淑安在今日不可以通家誼效慙慙也時奉功令爲

諸上公車者勸駕知台臺病情義無心應制但例當具呈本縣申  
詳藩司以便彙報儀部不則恐當事者不察聚以引避相絕未免屬  
忌有累明哲耳祈台兄速裁之專此以聞按臺  
盧大人景仰之切已託田寅翁專致不盡欲言

孤哀子徐枋稽顙拜鮮民之生僅餘一息固不能以  
垂死之身望塵匍匐且先人畢節捐生藐孤義當相  
從止水更不敢以應死之身隨時俛仰用是墜戶荒  
廬屏跡丘墓不復知有人間世矣不謂執事以牛父  
母說項之私遂致推屋之誼翰教忽頒獎譽謬及不  
孝誠兩間罪人何以當此捧楮汗背無地自容矣另  
諭領悉佩此殊私惟增銘戢尋當補牘臺端種種統  
希丙照口占率復伏枕主臣

答陳給諫臥子先生書

昨承面諭惓切復辱手教諄諄小子微末豈敢堅執鄙見惟是揆之於義反之於心有不能安者故不敢耳若安危得喪反非所斤斤也先公大節與日月爭光亦何藉小子之區區況今欲申大義於天下者亦當弗待忠節之後爲之區區也不肖之所以不欲以片紙隻字申達實自謂所處有確然不可移易者自不可與諸先生同年而語也長者當知吾心耳若漳海所傳則尤非吾所安以小子微末何所表見於時而乃遽臻此此不過以先人之大節而及藐孤若不肖不自揆覲焉就之得無昔人所云又因以爲利者耶言至此血淚與汗泚同流矣幸憫鑒血誠勿爲再

及則成我之恩又復何似乎不肖言盡於此矣率臆  
披陳悚息悚息

致楊解元維斗先生書

東來王君冒險而至崑訪臯里及吳趨而已既至吳  
趨家人辭以廬墓因復踉蹌到湖莊不肖在荒隴昨  
歸與相見渠致東道主人之命甚惓切所齋操者亦  
頗鄭重然不肖自有以謝之但王君急欲一登龍門  
以畢此來公案而不肖不欲令其冒昧走見故堅畱  
之而先崑尺一以達尊前此寔有深意長者當不以  
爲謬幸有以命之

答楊解元維斗先生書

徑啓東來云云不肖已堅謝之直令其衣褐還璧不敢啓視也尊諭惓惓具切至意第不肖所以處此不過盡吾分之所當然寔恨不能從先人於止水恐貽先人羞豈可以苟存之視息而反覲焉復有所勿冒乎所以毅然辭之揆之於義盟之於心實有自信者昨辭謝之際抵掌而談即銜命之人亦聞鄙言而爲泣下似不以方命爲罪此種血誠當俟躬侍山齋始一披陳耳至於左右自未可同年而語也主臣主臣

與胡其章給諫書

名周鼎

乙酉之變破家剝類故業俱隳所僅存者吳趨里第耳木主在廟遺像在堂雖藐孤已長往山林而笑笑

未亾尚守喪于此不意貴同門呂公忽欲以爲傳舍  
檄役掃除闔家驚惶無所奔避行路之人猶爲傷惻  
嗟乎嗟乎何至於此先人靈輅雖歸荒隴而堂中總  
帷儼然如在既無別業可以安頓遺累丙舍又止三  
楹不蔽風雨若以敝廬爲貴同門駐節之地是必撤  
先人之喪使未亾人露處而後可也昔鍾會百萬治  
第入見太傅衣冠猶終身不復進民生于三事之如  
一先人于貴同門禮先一飯自不致一旦有他人入  
室之心即使久爲廢宅人人得而有之在貴同門尚  
當有不經西州門之意况今老穉四十餘口於焉棲  
託者乎桺下之隴猶禁樵蘇文靖之宅不爲馬埒以



今視昔豈遂雲泥在不肖仍不忍薄待貴同門故猶諄諄言之也台翁錫類哀榮久彰高義知不待不孝辭之畢爲大聲疾呼而止之於垂至耳不然或即以不孝此札致貴同門惟貴同門裁之何如臨楮哀眩不知所云

與欽遵一書

名式

李灌翁先生至誼有加休戚同體真古人所無弟之所銘心次骨啻感無地者也若爲友貸粟云云則鄙意竊有所不欲特以父執尊行之命不敢不屈意勉領一次然夏初拜惠而至今胸中阨阨未安殊懷慚慚愚爾時即託鄭三山先生及家表伯張德仲先生婉

辭灌翁詳致鄙意昨者復承白粲朱提之惠則豈鄭  
張兩先生尚未道達區區乎抑或弟言之不誠故  
未蒙矜允耶鄙性硜硜頗嚴取與今雖饑餓未變初  
心此定荷灌翁先生及吾先生溪所鑒知者即夏初  
拜命時切叩先生問所自來謂若未得所安則當學  
孔顛以來米上水載去原札定在先生當可覆按也  
今所示惠諸君皆未通一刺未謀一面者弟又安能  
覲顏以食其粟耶未同而言昔賢所誠况未同而賂  
乎閭中叔不以口腹累故人若既非故舊而所累又  
不止猪肝一片則其所處斷可知矣來米四包暨銀  
五封完璧歸趙伏冀吾先生緩頰致還灌翁即以此

札并致去當懇慈炤也不宣

答吳憲副源長先生書

名嘉禎

附來書

尊公浩然之氣千古長存大兄純孝高逕林泉堅守先人之志士林莫不誦之但空山不可久居鄉村多盜剽掠之患其小者也近來匿影山阿者多不測之禍維斗臥子公旦彥林無辜慘戮大可畏也況妬賢之人此間不少不以忠節仰慕轉以立異美菲每聞其言不勝浩嘆倘有譏毀做成機穽誰能挽回滾爲大兄慮之今日之計速速進城與二哥同居兄弟相依和光混俗可以處亂可以避禍守身之道不得不然萬勿固執遺事後之悔特在世交敢效狂直祈大兄俯聽望之望之尊公大事及時早襄世界紛紛烽火可處并祈留意焉

跼接台諭披誦迴環感極涕零一字一泣老年伯愛之深故憂之切憂之切故誨之嚴心非木石能不怵明訓而陡焉自驚若冷水澆背蹶起而變計乎然材之所以竄跡丘墟側身猷畝者非不知孤立之召禍同塵之取容乃一往不顧也蓋亦籌之熟而處之審

矣先君子捐身殉國枋固不類不能相從九京然方寸之地猶耿耿未死即欲規方爲圓同乎流俗而探之大義心有不可忍者一察之時宜勢有不可合者三即以論于禍福而理有不可以彼易此者二重荷藥言屢及敢不一一爲長者陳之乙酉陸沈之日先君子日謀死所顧呼枋而命之曰吾固不可以不死若即長爲農夫以沒世亦可無憾而枋竊不自量必欲從死不謂天實靳之致閏月十二之變枋以病垂死另居弗克從而前志弗申矣然猶冀無毀髮膚他日庶可見吾親於地下因變姓名匿跡蘆中瀕死數番流離四月意或可以徵倖萬一不謂更罹意外身

嬰駭機當是時以全髮被戮早見先人未始非初心也而事與心左復受髡刑凡此者皆枋之求死而不得死亦自分必死而未死者也雖然其敢以志之屢挫身之苟延謂天之不欲我成也遂風靡波委廢棄先訓乎用是京京日夕一刻九迴然既無奇節偉行可以慰地下之靈所欲祇遵而無負者亦不過長爲農夫之一語耳顧一旦改頭換面從俗浮沉枋縱不自惜奈辱先人何此心之所不忍者也性本忤俗未克三緘即濫自悔艾而遇一時人聞一時事則當機輒發嚼齒穿齦不可復遏以轉喉觸諱之人而欲周旋於箝語防口之世一不可合也迂懶既甚筋緩肉

驚不可韋絃即在當日恪守庭訓經年杜門達官貴人都不識面今若仍其故我則入城無異居山而來而不往疵纍更生即欲強事奔趨而木強面目猝不能改二不可合也世網日密新法愈苛而枋祖臘非王衣冠猶舊幸與樵牧爲伍略能自繇一入城市動皆桎梏而必罹不測三不可合也且也褊衷狹性既與世日乖則世人視之將同怪鳥跡之所至矰繳隨之然其竄溪山之中網羅猶緩一與世近則羣起而逐弋人之慕須臾莫避故遷荒則禍遲而或可免入城則禍速而必無幸均一禍也何必去遲而就速乎是固不可以彼易此者也枋又聞之行莫醜於辱先

禍莫大於名滅先君子身任綱常爲南朝一侍郎從容蹈節枋既不能學從親止水之江錫獨不能學終身不西向之王衷乎倘偷飽苟溫強顏喪志不特不克負荷而且隳其家聲矣誅夷竄逐一時之禍也羞先人而爲世戮笑萬世之禍也擇禍莫若輕是又不可以彼易此者也凡此數端有其一且不可以入世况枋寔兼之乎苟不盡反其本來一以時人之性情爲性情而徒欲以入城免禍是猶惡沸而增其薪也枋之所以決意長往排衆非而守其所獨是溪有見乎此耳不然以枋之不肖無足比數即屹立狂瀾未必爲士林增重即隨時頽仰亦未必爲吾黨貽羞變

何所爲固持而確不可移乎實亦輓轡於胸一刻千  
轉審已觀時萬不能不出於此所謂籌之熟而處之  
審也今循此以往倘邀天之庇苟幸無事得老死先  
人墳墓之側固所至願即不然因此而觸時忌加之  
以不可知亦且甘心受之灑然無憾矣老年伯提命  
之勤視同子姓道義之愛恩逾骨肉故敢剖肝瀝膽  
直陳左右惟哀而察之至幸至幸

與徐禎起書

不肖弟與兄既屬世誼又忝總角之交兼之氣類自  
負不差知己違亂之後形跡雖疎神往自無間也數  
蒙手書見存獎譽過當愧荷愧荷方期尺牘相聞達



其積愆不謂忽遘荒隴盜樹之變爲人子者土室自  
錮不能出爲螳臂之奮以死爲歸其爲不類極矣昔  
李克行喪廬墓手刃盜墓樹者千古以爲美談始以  
爲史策之過錄今觀之而後知其列于獨行孝友之  
傳爲無忝也慚痛之餘自謂世講通門必以枋之不  
類而棄之絕之不謂吾兄以迥出千古之誼毅然爲  
之首倡聲罪致討義聲從此大振昨者豪猾俯首詎  
謂非子房一擊之力也耶不特此也將來先人四尺  
之封猶得蓬顆蔽冢亦孰非義聲之所貽耶感且不  
朽矣因思昔賢之門或以蹈時禁捍世網至有更名  
他師變易衣冠以自別非黨者此固人類所不齒其

最高義者景毅自表爲黨不以漏籍而苟免然毅固  
李膺之門徒也而已千古矣其有生未及北面而乃  
於死後禍患之際毅然以門牆自任而不難櫻時豪  
之鋒者不更加於古人一等哉不肖弟既感且痛中  
心服膺又可以書頌耶吾兄既有此迥出千古之誼  
不肖亦當破不入城之例一叩徐子之廬於分始安  
而病未能如何如何臨楮啣戢不知所云

答房師姜弱菴先生書

名荃林

自癸未秋伏謁函丈之後驟受大變死生契濶于今  
十年矣甲申冬曾一奉手教門生枋隨具奏記愧未  
能少效涓埃方謂竭誠有日不意南中之變又復隨

至天崩地坼不我後先國恤家寃萃於小子可勝痛哉乙酉閏夏先君子遂從容殉節畢命止水而材志操懦劣不能從親以死毀體苟活有忝所生平居自念如卞壺之清溪柵袁粲之石頭城俱父子蹈義日月爭光材乎何獨愧古人乎故八九年來遁水逃山不入城府堅臥土室閉門却掃交遊親串亦概謝絕其間屢遭意外幾更九死兵燹之後外侮疊來致先人五畝之宅既不能守汗萊之田十減其七麤布不完饘粥不給室人徧譏穉子恒饑人事寡諧生趣都盡此之爲悲悲可知矣然尚強延視息者先人大事未襄老師大恩未報在三之誼爲責甚重存此微軀

庶幾報塞而吳山蠡水一見爲難道路荆榛音問莫致故徒懷西風以好音望天南而隕涕耳何意使命儼然貺臨乎陳几拜稽開函誦讀喜極而泣不自知其涕之無從也亟進使者恭問起居萬福聞此數年之中老師涉歷艱危備嘗險阻門生枋辱在一體方寸如灼既聞高風峻節百折不回無悶山林灌園自給此即西山之薇東陵之瓜無以過也枋又不勝服膺愧企踴躍瞻仰之至矣所竊自慰者十年守死不敢辱身以辱吾親以辱吾師兢兢日夕每踰尺寸枋曾東一前輩云枋縱不能學從親止水之江鎬獨不能學終身不西向之王裒乎止此區區可以仰對老

師知亦爲老師之所心許也辱諭向年拙刻此枋少作不堪覆甃忽蒙齒及慚慙欲死患難之後枋竊有志向學遺書萬軸密爾自娛欲於古今得失之林有所論述以無負老師知人之明但未知此生能遂此微願否拙著一二種既以身隱焉文不敢付刻又乏傭書繕寫遂未及寄呈尊覽然就政自有日耳

與武部李霜回使君書

名令哲

十七年避世土室杜門守死饑寒垂絕甘而樂之而年來憂患坎圻艱難險阻無一日之寧今又爲弟姪官逋之累非死則辱不知稅駕竊思所以十七年長往不返者正不欲自辱其身以辱先人耳一旦以他

人貽戚而交手蒲伏受事公庭其能堪乎遂決意棄家子身遯跡漂泊湖外但此身雖出樊籠而一家八口盡在危地危急存亡此其時也茲託舍親王生先叩函丈不肖擬覓便風直造龍津卜隱茗雪之間埋名避世便當與吳門絕正如夏馥之入林慮變其姓名梁鴻之棲會稽自呼期耀愚雖不敏有志於斯未知執事能以伯通之廡假我否必絕遠城市可以棲託數椽足矣倘邀大惠遂其隱志則自執事一人而外不欲更使人間知此子之落誰處也不肖所望爲先人之王成者惟執事一人今將以茗雪爲桃源以執事爲王成何如何如

與閩族書

先人創立義田均潤同宗二十餘年於茲矣枋雖不肖仰遵先志守而勿失亦十七年如一日也十七年來食租則閩族成丁出納則歷年主者顆粒毫釐與枋無預但上以繼志爲心次以贍族爲念豈計一身之利害哉國變之後親友關切有遠識者逆知將來由必爲累勸枋早爲之所寔非一人而枋堅執以先人遺澤豈敢輕毀苟同宗食德而於枋無大害則支吾補苴以身當之而義澤藉以垂久苟閱幾十年遂可無廢此初心也詎意年來錢糧干係如許重大豪釐星誤則身受戮辱家以破碎甚者辱及妻孥如某

家某家可見矣彼自任輸納者且然今義田既爲公器又復任非其人緩急完欠略無主裁設有意外誰任其咎而均田在即則里役雜來庸調踐更誰尸其事展轉思之不寒而慄俱非世外隱居之人所宜以身爲嘗試者也若使有利則闔族均霑有害則獨歸之先人之孤避世之人此固理之所不出且亦闔族尊長所斷斷不忍以相貽者也九月中即致書任事之人及于木大兄託其轉商之闔族一則逐分割田一則售田分價意謂即有成說而今事在至迫非可緩圖而田非迅貨售價之說自不能行惟有分田爲大公至正耳田分則即有賦役之煩亦自衆擎易舉



且人自爲守則輸核必嚴錢糧出納斷無罣誤在闔族仍享義田應得之利而在枋則無戶役非常之害寧不一舉兩得仁至義盡不待再計而決者哉闔族成丁給米者不止百人其田不便如此瓜分惟當分房合剖其單丁則附分本身親房之內各房就所分之田共爲料理昔八家同井尚守望相助出入相扶况今皆分形同氣之人哉此亦仁至義盡不待再計而決者也既分之後隨即收戶豁去先人戶名以免意外之慮則先人幸甚先人之孤幸甚不肖枋不勝激切之至肅候報音即便將田均配肥瘠訂期闔族到山公同拈鬮分析不肖枋不勝翹企之至主臣主

臣

與楊明遠書

名始

兩年踪跡疏濶幾同參辰然每當形影一室寂寞蕭涼之時未嘗不念我楊子也前辱以大文見示意者亦以此子於此頗有所見而尚不我遺棄乎意甚感故爲縱論之夫作文貴有筋節筋節者段落也于文則爲段落于人則爲骨格夫人之骨有長者有短者有巨者有細者有橫者有豎者有圓者有銳者有合用者有獨用者有接續以爲用者體類不同各適其欵然後貫之以筋脉而運之以氣血則爲人矣文猶是也其段落者骨格也其意與氣者筋脉也而詞藻

則血肉也故段落既定而少意氣以貫之則脉不屬有段落意氣而少詞藻則色不榮今且置意氣詞藻不論先論段落苟逐事爲叙逐段衍說一事數語靡有重輕如人之體髀而與指節同其長短頭顱而與蹠掌同其瑣碎豈能成人哉子瞻云節節而爲之葉葉而纍之畫竹猶不可況於作文乎故文有疊聚法有鋪張法或一言而包舉數事或數語而該括生平此疊聚也或一事之微一日之近而連篇累牘以言之又重複言之又流連而嗟歎之此鋪張也惟能疊聚然後能鋪張能鋪張然後能疊聚二者固相須爲用也所謂疊聚者非率略也貴簡而明核而不窘所

謂鋪張者非敷衍也貴關係貴精采動色而陳鑿鑿  
娓娓使讀者惟恐其文之竟也斯得之矣其一言包  
舉數語該括者猶指節也猶踐掌也其一日一事而  
連篇累牘者猶體解也猶頭顱也能大能小能長能  
短能大者小之能小者大之能長者短之能短者長  
之斯善作文者矣此所謂筋節也試看馬班諸篇無  
不然也夫段落得而後意氣行意氣行而後精采出  
三者亦相須爲用莫分先後無有主賓者也如逐事  
爲叙逐段衍說一事數語靡有重輕則段落不分而  
意不立意不立則氣不行氣不行而精采索然矣所  
謂精采者乃精神丰采也非詞藻之謂也詞藻止可

以點綴裝飾而不可以爲實用故史漢中多用詞藻語然皆在閒事瑣事借以爲一篇之助若其大綱領大關鍵處則必用淡用真惟淡故有味惟真故能動人若于所謂大綱領大關鍵處而亦以詞藻出之則去之遠矣生氣索然矣况所謂詞藻者又未必詞藻乎如史記屈原賈生荆軻貫高李廣諸傳漢書李陵蘇武龔勝諸傳其于死生頓仆降囚憂辱忼懣激發處不過常語數四流連抑揚宛轉重複而哭者爲哭笑者爲笑矣夫文之爲人作傳紀猶畫之爲人傳神寫炤也冠裳衣履樹石器物非不朱紫雜陳粉黛並用而至於點睛則惟墨而已所謂冠裳衣履裝飾也

所謂樹石器物點綴也若點睛則一身之生氣在焉此大綱領大關鍵也苟于文之綱領關鍵處而用詞藻是以朱紫粉黛爲人點睛也其可乎吾要有一喻如名家之宴客珍極水陸不厭濃肥然所以合賓主之歡而節清言之緒者則惟酒與茗而已珍極水陸者以悅口也以目食也故可用其裝飾點綴也而酒與茗所謂綱領關鍵也故惟淪之以水而不可以膩鼎腥醜薦也苟謂濃肥之悅口而以肉羹烹餽渚飮餽溷清聖則人能不唾之而走乎夫人既有骨格而一身大肉俱在間處如手足則去肉什九至耳目之用則全無肉矣苟以大肉而積於手足耳目之處則

骨雖存而能不臃腫痿痺矐矐而翳塞哉故爲文段  
落既得之後猶當審詞藻之宜也夫人之無事者難  
爲文而人之事蹟多者亦難爲文故於無事者貴有  
識力而于事蹟多者貴有裁制何也夫人即無事然  
一生而豈無數事抉摘其微使有關係所謂能短者  
長之能小者大之也夫人即事蹟甚多然一生而豈  
能事事皆大綱領故必裁簡其要使有定論所謂能  
長者短之能大者小之也苟逐事爲叙逐段衍說則  
無事之人可數言而畢而事蹟多者乃盈策不止也  
有是理乎即如管子一匡九合尊周攘夷其事蹟不  
勝書矣而太史公傳之無多語陳孟公似一酒徒耳

而班固傳之娓娓一千幾百言此可見矣雖然此不可以躡取也學至而得之矣弟固不能文然于作文之道頗有所窺見至紀傳之體尤識一二以于此中久也誠以馬班諸篇一尋繹之必以余言爲然恃愛妄言幸勿怪

又

今人爲人家乘中作傳無非掇掠行狀中語彙括成文即天下所推之文章大家皆然未有自出一奇自成一文者也兄試揀世間名家之墓錄或家譜閱之即知之矣弟今爲尊翁先生作傳則獨出手眼另開生面絕無一言一事與尊狀中相同者而又本來面



目具在恕先在焉呼之或出也前於萬峰遇侯硯德  
硯德最精於史漢弟與之論史學云人而操筆爲人  
作傳不特其人之鑪冶直是其人之造物硯德曰何  
謂也弟曰若爲其人之鑪冶則其人不過任我之陶  
鑄今爲人作傳則其人直惟我之生成矣安得非造  
物耶硯德曰作傳爲其人之造物極妙語弟須具無  
上識力抉摘其人之生平去取重輕無毫釐冤枉爲  
得耳弟曰豈有造物而枉人者哉君獨不記載者培  
之傾者覆之耶惟不枉所以稱造物也硯德再四稱  
善遂劇談至夜半而寢即如爲尊翁先生作傳若但  
推其詩畫而沒其一生真意即云詩即李杜畫即董

臣而枉甚矣何也其生平不在此也且亦易盡而無  
餘蘊矣故弟於詩畫略之而抉摘其一二事以爲傳  
實以此一二事便可概生平也其文頗亦淋漓痛快  
無愧史漢家法或有嫌其偏重一二事而于尊翁生  
平交遊及所登臨之處不免太略者愚意殊不謂然  
若逐事爲叙隨時詮次是日記年譜矣所遊必及所  
交必載是輿地圖點鬼簿矣豈得言史筆言作傳哉  
只如陳遵傳反覆千餘言止言其遊俠好飲酒而於  
其立功封侯皆略之楊王孫傳一篇止言裸葬一事  
而于其家累千金善黃老學皆略之何也惟此足以  
概之也觀此則足以知弟文矣雖然此惟史漢爲然

若後世諸史則亦幾同或者之論矣爲尊公先生作傳畢甚快故不覺復及之

與葛瑞五書

幾年以來入山過從此晤最樂無風雨以恠之無疾困以賜之無惡賓俗客之闌入無塵緣外累之嬰心一樂也板屋繩牀可以棲息閑窓名花可以坐對池亭巖壑懸之杖端怪石幽泉不勞展齒一樂也穉筍正佳有同玉版新茶適口何須雷莢而瓶中之粟未罄牀頭之酒可醉一樂也開懷任意知無不言而操心既危冥與道契時時得兄首肯若以爲可與入道者此又弟之所最樂者也吾兄徘徊仙掌峰下則有

把酒邀明月之思又聞有于竺塢精舍瞑坐七日之  
願及臨別則有再過相存之約三者俱不可負十二  
日有畫集賓從頗多願吾兄於十三日來正當月色  
極佳時今年天氣少雨新夏寒燠適宜可坐巖石之  
側傾尊劇飲以醉爲期酒渴則汲澗泉淪新茗啜之  
而山中老友有能吹洞簫彈鳴琴者倩其一弄與松  
風澗水互爲響答吾與兄則賡采芝之歌和幽蘭之  
操攬景會心遺脫生死當使千古而下仰我此遊豈  
特與竹林西園爭勝哉追逸嘯於蘇門飲霞觴於瑤  
池無以異矣六時之中兄須幾時瞑坐弟則更不以  
談擾兄或吾自歸草廬及兄坐起而欲飲欲遊則又

未嘗一刻不與兄連袂披襟也如是以爲遊不與獨  
居寓齋有間乎如是以邀兄而兄能無來乎嗟乎多  
生結習以朋友爲性命世亂以後如須遠人爲吾至  
友每一相過則孟公之投轄彥國之閉關無所不至  
酒盡粟罄典衣繼之直至醉而病病而不能興然後  
散去而輒復作數日惡今年齒日加憂患日浚遇事  
日淡自以爲能忘於情而于吾葛子之聚散則猶不  
能不作惡也嗟乎人生一世間良朋亦何可多得此  
凡人皆然况又避世獨處之人耶嗟乎如須死矣遠  
人又不可復問而吾葛子復遠居下邑相去百里一  
歲中大都得兩過從耳每花月妍麗風雨淒其或一

室獨坐或臨風極目悄焉傷心低徊泣下人或怪問而不能言也事往自問而亦不自知其所以悲也承平之時交滿天下一更喪亂僅四五人三數年間復漸汰去而止得如須遠人今日者茫茫天下知我者如葛子豈復有二哉而吾之所以惓惓望葛子之來來則惓惓不忍令葛子之去情與昔同而意則有進矣吾亦願吾葛子之大慰其心惠然再來而更有以進之也

與潘生次耕書

次耕足下自古文章名世立言不朽者多矣而驚才天縱橫絕古今當成童之時擅國士之譽而卒能有

以自立其文辭不少槩見可指而數也於此見天之  
生才實難非所謂千里比肩百世接踵者乎次耕足  
下今年始十八耳而落筆千言汪洋自恣辭賦懸於  
日月才調驚於風雨騷人詞伯見而斂手此不特今  
人之所絕無即求之古人亦所僅有昔人謂文章風  
氣關乎世運如足下之挺生以幾成立不將大振風  
雅起衰扶敝足爲世道慶乎而僕則尚有惓惓之愚  
欲進之於足下也昨四月十二日得讀足下登華山  
詩問知足下年甚少便已驚絕心中時時有足下及  
兒子持足下還山吟韓蘄王墓碑歌來再讀之則益  
驚喜過當歎息絕倒而復不能不爲周詳憂念于足

下也嗟乎天之生才實難而耗才甚易物之尤者忌必集之故富極貴溢災禍橫生况天之忌才倍甚於富貴乎賈誼年十八誦詩屬文名振洛陽終軍年十八上書天子發策漢廷陸雲年十六爲芍藥賦辭義竝美王勃年未冠射策高第獻頌闕下之數子者莫不抱不世之才驚天縱之姿以遊於不朽之林則其所成就寧有量哉而夷攷其實率未有讐其才者獨賈誼辭賦之盛比于風騷治安之書聿稱王佐可謂裒然有成矣而乃以銳于制作紛更無序以致卒絀于時識者猶不能不致憾于誼之不能用孝文非孝文之不能用誼繇茲以談生才既難成才尤難而處



才益更難也有奇才者必有奇阨得之太奢失之亦太劇盈虛消息物理固然所以古來賢才奇傑之士大都死生契濶顛沛流離家道坎珂身嬰沉痾其所遭遇必極人世之所不能堪有不可一朝居者然而或成或廢所立迥殊則所以處其才者異也故才一也善處之則日月爭光不善處之則草木同腐湮沒不傳可勝悼哉可勝悼哉夫桃李之花非不穠麗也蒲柳之生非不鬱怒也而風雨以零之霜雪以籍之而掃地盡矣無他彼固徇其華而未徇其實有其外而未有其內也若松柏之有心竹箭之有筠則不然矣所以賢才奇傑之士其所爲死生契濶顛沛流離

家道坎坷身嬰沉痾者固天之所以阨之亦正天之所以成之也葦爲松柏竹箭則成爲桃李蒲柳則廢耳雖然其所以爲松柏竹箭者又豈異人任哉次耕足下僕固未深知足下然就一二所聞及往往見足下詩歌中所稱述則足下之遭遇亦良苦矣僕甚爲足下痛之而又爲足下幸也足下既抱不世出之奇才擅窮人益工之絕藝而天復以憂患坎坷玉汝于成則天之所以與足下者甚厚而足下其可輕用其才而輕視其所遭乎憂患以動其心窮愁以堅其骨而益靜其居處簡其出入嚴其師友收斂其才華克拓其器識藏其鋒以需大試養其氣以期大成則異

日所成就又豈古今一才人能盡足下哉足下才不  
患不奇名不患不聞而僕之所以惓惓不能已於足  
下者有其才而善成之成之而善處之也高密侯鄧  
禹光佐中興功流天壤元宰通侯年二十四則其才  
亦甚奇矣然未嘗以年之太少才之太奇而嬰造物  
之忌來人世之尤富貴壽考以功名終無他其所以  
處才者善也昔阮籍見張華鷦鷯之賦而識爲王佐  
之才王通讀陳子昂感遇之詩而知其爲海內文宗  
以今觀昔去人不遠以足下之才何難詣此然藏之  
不固則發之不長試之屢罷則千里一蹶故僕所願  
於足下者旂常鐘鼎之勒銘清廟明堂之雅頌成一

代之制作爲詞林之盛事立言不朽與德功齊豈徒  
齷齪鉛槧月露風雲而已哉語云千金之弩不爲鼯  
鼠發機又云衝風之末曾不能飄鴻毛蓋謂大器之  
不可輕試而力殫者不可復振也是亦望足下之善  
處其才也舉世橫流知音者希次耕足下幸勉自愛  
徐枋頓首頓首

與時次其書

風雨至而不輟其音霜雪零而不渝其色此誠碩交  
古人所少所以古人亦每稱歎而致慕焉若次其先  
生之于不肖則誠有之矣不肖弟迂鄙無似落落寡  
諧遂爲異己所嫉不戕之不止撫事悼心時爲摧絕

昔人謂歐陽永叔耳白過面名聞天下脣不負齒時  
罹毀謗不肖弟不有其名而時有其毀此誠骨相所  
招又何尤耶然虞翻云死當以青蠅爲弔客得天下  
一人知己而可無恨今不肖雖爲怨嫉者所不容而  
乃得次其先生爲知己則所得不較多多耶不肖弟  
誠幸甚矣天池一雲僅隔一嶺過從頗便今既復他  
之恐晤對將疎惟此爲紆鬱耳如何如何瑞五將同  
言夏致一過訪次老能同來更樂先此申謝餘面頌  
不宣

答惠生而行書

兩日賤恙稍減然耳聾如故竊思千古聞人如左丘

之盲楊雄鄧艾之吃仲長子光之瘖習鑿齒之跛皆有之而未有以聾著者意造物者今將以僕廁其間耶笑笑杜少陵句耳從前月聾然要是文人寓言亦未許闌入此社也絕倒絕倒僕年十四五即泛濫於諸子百家自漢至宋說家者流無不熟覽然仍無暇於此每兩三年一翻閱耳亂後將二十年亦僅得三四寓目昨承假我展卷如對古人兩日已盡閱遍矣所謂百川學海者此謬書也乃庸妄人目不識丁者射利而爲之大都剽割陶南村輟耕錄而妄爲之標題耳而又剽割其至下者吁可歎也茲藉手壁上其唐人小說餘卷千乞盡數假我願卒業焉僕當賴以

起病不啻讀陳琳之檄也切望切望

居易堂集卷之二

書

與葛瑞五書

弟徐枋頓首頓首致書瑞五道兄尊前弟自二十四歲而遭家國之變今忽已四十三歲矣覲顏倫生于喪亂憂患之中轉眼不覺遂二十年回首二十年中其所遭萬死而一生及自分以必死而不死及必不欲生而復倖生者不可以縷述也退之云譬如痛定之人回思當痛時未知若何以自處也而況今二十年矣而痛尚未定者乎噫爲可悲也蘇子卿陷身絕域十九年而歸漢所謂丁年奉使皓首而歸千古而



下讀之猶爲隕涕今已二十年而日月尚悠嗟乎人生幾何何以堪此弟今年纔四十三耳而鬚髮半白齒牙搖落而筋骨關竅之間自知有淩入之病嗟乎憂能傷人其信然乎然以二十年偉生而自謂尚可與兄披襟解帶而無愧者非獨以杜門守死爲然也此二十年中所成書通鑑紀事類聚三百若干卷廿一史文彙若干卷讀史稗語二十餘卷讀史雜鈔六卷建元同文錄一卷管見十一篇計成書亦且幾百卷矣然弟之無愧于兄者不在此也二十年讀書課文編輯之中益亦有得於身心之學焉聖賢每謂能自得師又謂無常師弟雖不敏然於土室面牆形影

相弔之時而往往自得師也於古於今所聞所見有一人一事之可敬可羨者輒以自驗吾能如是否也有一人一事之可羞可惡者亦輒以自驗吾能不如是否也有一人之砥行於一世而失節於臨時者輒以自驗吾能不如是否也有一人之脫略於形骸而矜慎於衾影者亦輒以自驗吾能如是否也偶見古者於極寬大中而忽引繩批根于一人一事輒以自問吾罹此何以自處也偶見今世於極慘覈中而忽疎節濶目於一人一事亦輒以自問吾遇此得毋苟免也如是者二十年於茲矣矻矻窮年孜孜不倦蓋吾心無一息之停也孟夫子所云孤孽之操心者乎

易曰君子終日乾乾夕惕若魯論曰君子坦蕩蕩惟其終日乾乾夕惕若所以能坦蕩蕩也所以第二十年來于平居時若履春冰之必陷也若蹈虎尾之必噬也及至世路構稽天之波弋人布彌空之網而我坦然未嘗動吾心而嬰吾寧也何也自信我之必不預于是也必不預於是蓋以平時淡自處無以招之也苟平時淡自處無以招之而吾不幸而仍闌入其中此亦定命也此亦無悔于中者也又何以動吾心而嬰吾寧乎凡事之足以動吾心而嬰吾寧者皆前有以致之而後有以悔之者也苟前無所致後無所悔則斯人而斯疾吾又何與焉東漢黨錮之禍徧天

下名士無得免者而夏馥申屠蟠陳寔則獨免焉其  
免也不於其後而知之也於事而有以知其確然不  
染者不於世之遺其人而知之也於其人之自處有  
以知其確然不染者苟夏馥申屠蟠陳寔而仍不免  
吾知其所自處又必有以異于人矣此弟之素所蓄  
積也操此心二十年而于貴賤貧富之界則已劃然  
于中無所淆奪矣獨於生死之際恐尚未能持之確  
然而處之悠然者是所望於吾兄一言之起予也然  
所謂未能持之確然而處之悠然者非不知義死之  
足貴非不知倖生之可羞也恐明知其貴而不能貴  
之恐明知其羞而不能羞之也且恐知其貴而或促

之促之而反潰也知其羞而或激之激之而反餒也  
弟嘗舉此說以講論於親知友朋之間或有爲之說  
曰此向平所謂讀易損益卦而已知富不如貧貴不  
如賤但未知死何如生者乎曰非也此悖道之言也  
若此言之信於人吾知其喪故吾而改素節者踵相  
躡也趙元叔曰不飽煖于當今之豐年夫飽煖之愈  
於飢寒人人而知之也惟以義較之有飽而其害勝  
於饑者有暖而其害過於寒者故寧去飽煖而就饑  
寒耳若曰錦繡之美不如粗布重裘之溫不如露肘  
芻豢之旨不如草根食前方丈之飯不如藜藿不糝  
有是理哉苟一反而真知粗布之不如錦繡也露肘

之不如重裘也草根之不如芻豢也藜藿不糝之不  
如食前方丈也而有不盡去粗布露肘草根藜藿而  
錦繡重裘芻豢方丈之是趨也哉昔驪姬之適晉也  
蓬首而泣流涕被面及與君同匡牀食芻豢而後悔  
其泣之過也彼固不知嫁之爲美也又何怪今貞女  
烈婦終身不字者有矣盛年自毀者有矣其性豈有  
異乎人哉彼固洞然乎男女大欲也居室大倫也而  
事固有重於此者故不得不忍而出于彼耳豈貿貿  
焉而謂琴瑟之調嫵婉之好顧不如窮獨伶仃枯槁  
而瀕死乎果貿貿焉以從之吾知其不崇朝而去之  
潰然若水之決而趨下而不可止也蓋以窮獨零仃

枯槁瀕死之萬苦而難居而琴瑟嫵婉之多娛而易處也故君子之所以自處于貴賤貧富之交死生之際必精求而審處之惟其講之精而處之審故富之以萬鍾千駟而不顧貴之以三公之位而不易貧之以饑寒顛仆而不悔賤之以編氓一介而不移然後刀鋸湯火視之如歸不動聲色也夫子曰富與貴是人之所以欲也不以其道得之不去也貧與賤是人之所以惡也不以其道得之不去也唯明知富與貴之可欲而必不可處明知貧與賤之可惡而必不可去惟明知其可欲而不處則其不處也爲可久明知其可惡而不去則其不去也爲可恃不然鮮有克終者矣

故曰此言而信于人而喪故吾改素節者踵相躡也  
而人又謂殉節爲易守節爲難爲烈婦易爲節婦難  
而吾又謂其非也人有幸而致死者矣未有幸而終  
節者也故曰死節易也而不知不倖死則死節難矣  
人有不幸而改節者矣未有不幸而再生者也故曰  
守節難也而不知以守節致其死則守節爲易夫守  
節者守其所以死也因時制宜從容中道不後時而  
忍濡不先時而傷勇不得死所而不隨得死所而不  
去正如饑之於食渴之於飲日出而起日晦而息也  
孟夫子曰繇仁義行非行仁義也吾亦謂非吾之能  
死也乃死之爲吾所也此其所以爲難也史遷曰非



死之難處死爲難知言哉不然僕隸賤人尚能引決  
況天下之士乎吾之所謂難者吾之所謂未能持之  
確然而處之悠然者此也嗟乎二十年之所有得者  
如是二十年之所不能自得者如是惟吾兄有以教  
之弟枋再頓首頓首

答宮保張大司農書

名有譽

徐枋頓首頓首敬答書於宮保大司農閣下枋生也  
晚然竊論當代人物及古今得失之林間嘗慨然以  
爲閣下固國朝三百年來名計相也以閣下德望之  
崇規摹之遠何難使國有文景之富俗有成康之隆  
也哉顧乃崩天邁禍宗社爲墟致竄身於香林白社

以老俯仰今昔能無泫然昔張蒼爲漢計相佐高祖  
定天下功名克終封侯累世何其盛也以蒼之賢詎  
能望閣下哉而人生遭逢不同有如此者又可慨矣  
然伏念古人正復有如閣下之所處者李伯紀無救  
于中原之陷家鉉翁不能挽臨安之亡意者天篤生  
若人又以振兩間之正氣維萬古之綱常爲大且重  
而非所論於一國一朝之存亡乎至于國破以後名  
臣遺老其立節之嚴處身之當遠者吾不能知若大  
江以南固未有如閣下者也閣下自託於和光以曲  
全其峻節自逃于無所可用以并泯其苦心所謂二  
十年如一日者惟閣下一人耳今世亦須才矣亦嘗

搜羅于我朝之名臣遺老矣如某公某公者亦嘗改  
故吾而從之矣枋嘗竊論之以爲今世之須才正如  
以新造之家須健婦以立門戶則其所求者將刺繡  
之工乎詠雪之才乎抑有待於操管鑰之能擅籌算  
之長者乎其所求在此而不在彼亦斷斷明矣乃所  
謂刺繡之工咏雪之才無不致其招徠褰裳就之而  
素負管鑰籌算之能有克家賢助之稱者獨能自託  
於清淨蔬素若一無所可用使求才者獨不我及以  
終其身於老寡婦噫不亦難乎閣下固國朝三百年  
來之名計相也顧獨能泊然二十年以自老於香林  
白社其苦心峻節又何以異此嗟乎以閣下而自老

於香林白社此枋始不能不致惋於閣下之遭逢而今則又不能不致歎于閣下之苦心峻節也枋獲侍屢杖望顏色者十有七年於茲矣十有七年中之所以觀于閣下者如此故敢因賜書而一及之至於鄙文固謬未能一言之幾乎道過蒙獎飾復何敢當冬間擬輯二十年來拙著之略有當者爲一集未知得遂否承委大音先生遺卷謹題壁上惟有以教之淡秋寒煥不時伏惟道履自玉不宣

答靈巖老和尚書

底事亦熟聞之以不足望我胸臆故不復置之齒牙浮雲太虛不特不足累亦正復不必知也所以尊教

所云助喜則未必而懊恨則絕無之然愚意以遭之而喜則反似胸中猶有物在不如竟不知之爲要愈耳未知和尚以爲何如像法末流鬪諍堅固風波噂喅在所而然所賴大人者兼容并包如水入滄溟金投太冶遇之則化歸之則融天下無復事矣不然其間詎能以寸哉是吾今日之所以益心折於吾師也

與堯峰月涵和尚書

名南潛雲巖嗣

杞人之天既墜然豈無斷鰲足而柱之煉五色石而補之者鄙意百凡宜以靜鎮之即此天而終墜矣尤宜以靜鎮之何也動固無益也况人定自能勝天平近者頗聞山頭不無紛紜我心悵然及雙老札來云

一衆星散我心益悵然及聞吾道兄獨襆被書卷振策登山不覺以手加額曰賴有此耳宋紹興中金亮南侵兵焚采石長江無一舟敢行北岸者獨張魏公以一小舟徑進一軍見之以爲從天而降遂以退敵今以合衆下山之時而吾道兄奮然獨往何以異此古德云出家乃大丈夫事非將相之所能爲今日若無道兄一人不幾疑此語爲欺我耶亦不幾令天下後世謂法門爲無人耶心折之至不覺開懷饒舌惟心亮之近來聞見頗多不愜鄙望處獨賴吾道兄一人爲狂瀾一砥耳并望敬致老和尚爲萬世觀瞻不佞弟不勝手額望之

與天善開士書

世外之人擁膝瞋睡忽然風吹一信幾於天墜海翻  
爲之陡然而醒亦陡然而病也旬日以來繫念兩山  
寸心如灼既而念之人生力量全在死生憂患時用  
必須於極震動中鎮定極忙亂中整暇始驗平時學  
問得力處耳譬如阿家翁平時節衣損食持籌握算  
積之既厚即遇水火盜賊非常緩急寧爲所困哉法  
門今日固是非常之變兩山堂頭自是非常之人當  
自處之裕如即吾法兄學問有素自無須凡夫爲不  
量力之涓埃也以相念之極不覺饒舌及此一哂置  
之

答惲孫菴書

名曰初字仲升昆陵人

退之生平倔強高自標置謂世無孔子不當在弟子之列及讀其答殷侍郎書抑何下也至云每逢學士真儒歎息踖踖愧生於中顏變於外不復自比于人嗟乎非侍郎之所論述有以浚服退之之心及退之之勇于求道絕不自欺其能如是乎雖然侍郎所論述訓詁之書也而退之推尊若是苟進其訓詁者而昌明聖學克紹宗傳則所以推尊之者又當何如乎此所以兩月以來不肖時時服膺我孫菴先生而不能去諸懷也不肖前伏讀先生論性書漸涵反覆幾於寢食其中枋雖於大道蒙無所進然正如撥雲霧



而見日星縱不知天官律歷之學亦無不欣觀者及昨復讀山陰劉先生行狀則更歡喜踴躍咨嗟讚歎而實以爲當世之大文也不肖枋兀居土室孤陋寡聞而獨於史學微有所見每歎休文腴而不核延壽雋而無緒遷固風規于茲虧損至後世之史史法全亡故叙致劇詳而面目不出即如李伯紀一傳至一萬五千言而其全宗社於一言係存亡於一身精采殊未嘗也朱考亭一傳亦八千餘言而至其晰微言紹聖統精微殊未闡也嗟乎亦可見傳一鉅人成一鉅篇之匪易矣而况劉先生狀寔兼伯紀紫陽之傳合而成一文者耶其難更可知矣而今讀尊著則如

聞其言如見其行事非有以扶摘心傳大開生面寧  
詎臻此乎吾以爲子瞻之狀溫公實未能爾也歎服  
歎服至性命之學枋雖不敏竊不敢自棄則更願先  
生有以卒教之

答友人書

僕作畫三十年而賣畫未及數載始者實以避世之  
人不應復以姓名筆墨流落人間而比年以來物力  
日艱人情日索當世之一銖一縷既爲不飲之泉而  
同志故人可以通有無相緩急者又皆自給不暇又  
見古人立身常有持之過峻而事窮勢極反致盡失  
其素者故不得已而賣畫聊以自食其力而不染于

世耳然非我求蒙迫而後應且賣者不問其人買者  
不謀其面若百年採箬桃椎織屨置之道頭需者隨  
其所值亦置道頭而去仍不與世相接而與物交關  
也而僕以爲克類致義之盡究非埋名避世之所宜  
私心自期俟前歲營葬買山二事積逋既完仍當課  
童豎勤畊作捆屨織席爲圃灌園以自資而竟謝筆  
硯此吾心也今不知我者至因僕之賣畫而屢屢強  
其所不欲或欲書字或須面請爾爾則輸重價不爾  
則未能如值僕笑謝之曰若欲求富當不爲此故爲  
署門曰避世之人杜門却掃近資筆墨聊以全生非  
以涉世蓬蒿弗翦猿鶴無驚幸孰甚焉蓋有所謂也

然此自以諭不知我者耳若足下久要雅誼自託心  
知何亦涉于一二俗人之態而強我以所不欲耶僕  
之所不欲者任王生持吾畫冊逢人便售耳豈有他  
哉若謂山中書硯之物猶足償僕畫價隱囊塵尾王  
謝家風動皆珍貴僕雖愚猶自能知之一笑一笑

與朱致一書

名用純 附答書

五年濶別三年訂期然後得一晤言一晤言而後喜  
可知也然別則五年聚僅五日彼此所歷之千頭萬  
緒欲吐之千言萬語俱不及一二兩人如望氣者俱  
各領之雖云心領然究以未能大暢彼此之胸懷至  
今爲之耿耿又承吾兄首肯於弟若於五年前有所

進者弟自譬正如草根花朵其長易見其妍易知然  
究無根蒂遇風則折遇雨則零矣至如吾兄學道有  
素已如棟梁喬木驟而挹之未見其加于前也而光  
輝篤實處自是日異而月不同何況五年耶弟有心  
學問而苦無師傳就吾一二心折之友又未能日聚  
一堂切磋勘驗窮年累歲弔影面牆靜中固未敢一  
刻放吾心而無如未得把柄故乍開乍塞旋悔旋復  
一日之中輪迴升降不知其幾且結習既深塵根難  
泯故既知之而復入之既悔之而復犯之嗟乎阿難  
所云安得有如來惠我三昧耶言念及此不但通身  
汗下當亦自爲拊心而悼也如何如何至於弟於五

日之間細窺吾兄精神收斂工夫縝密全於起居語默飲食動靜時體認幾至一毫不漏弟實爲心折此實近來學道者所絕無也近來學道之人或竟以道自任然夷考其實大有敗闕處不特燕居獨處時時露布即稠人廣衆中亦或自不能檢點已爲明眼所炤破者不少故弟心折于兄以爲此寔當今學道者所絕無也但願吾兄以此縝密工夫直下鉗錘於弟使弟知所依歸知所循繹則是吾兄之大有造於我也弟之所祝禱于吾兄者唯此耳倘吾兄果以此子爲可教不吝時一過從使弟得信所懷來則感佩當何如耶諄切諄切

古人三日不見輒擬刮目相待何況五年弟自問行無所益學無所得冒昧而前慚對良友若吾兄則德高而懷益退學大而心益小足見吾兄省治之功精矣密矣其爲進境弘矣多矣接見九月朔日事猶懇懇懇懇自視愈欲然不足而謬以弟爲少有所知委懷下問者無乃捨秋陽之曜而資螢爝之末光忘洪河之流而泥涓勺之微潤耶然弟安敢仰負虛懷不一竭其困陋以報尊旨今人有以程子主敬之學爲執著而不圓通者又有以爲未足盡聖人之學者弟獨以爲敬即天行之健天一息不健則四時不行一端不健則萬物不生易於乾言健不言敬於坤言順即言敬聖人法天之健故六經四子皆言敬也一敬而天下之理得矣天下之能事畢矣堯之允執厥中敬也舜禹加之以惟精惟一而敬尤著不敬則稊何繇精不敬則輟何繇一自是以後歷聖羣賢未有外敬以爲學至於文王而詩書所以言其敬者尤爲曲盡使非文王實有以積中而著外安能稱道精微若是故曰文王我師也但敬有自然者有強勉者不思而得不勉而中從容中道自然之敬也非禮勿視非禮勿聽非禮勿言非禮勿動強勉之敬也吾輩能于一念之發一物之應實下強勉之功自然漸進有得以吾兄之二十年大節苦行敬身之道當今之世孰逾吾兄而手教猶云結習既深根塵難泯既知之復蹈之既悔之復犯之此吾兄之所以既弘且毅必求至于聖人之域而吾黨之所以仰望而莫可幾及也然所云既知復蹈既悔復犯必有實見其然而非貌爲是說者此無他主敬未密耳視聽言動或從內出或從外來未有不聽命於心者聽命于心而以吾之神明才力可否行止其間未有

可行而不可止而不可止其所不可止行其所不可行者也但此際幾微之辨最宜體勘可否或出於太虛或出於偏著此人心道心之殊誠偽之判而王霸之所由分也要之吾心若能時時警覺則虛與偏者亦自有不容掩昧者故易曰齋戒以神明其德即或事大理微學有未及則參之前言往行質之友朋議論亦所以盡敬也雖事理極明且易苟平昔此心放倒臨時安得卓然不亂故君子有全體之敬有隨事之敬隨事之敬即是全體之敬但於動而爲用更加之意耳竊觀吾兄酬應人倫微喜諧謔雖無損于大節要非君子之所宜爲何者德盛不狎侮也書所云狎侮君子罔以盡人心狎侮小人罔以盡人力猶是爲治天下須得人心人力者言之若學者之事則身心之間何處可容狎侮身狎侮而其職不修心狎侮而其體不立所謂德盛不狎侮者正以狎侮之非有害于人而有虧于吾德也孔子曰修己以敬已非外人物而爲孤子之已修亦非外人物而爲偏寂之修與人接物而不失其敬正是持已而不失其敬故一修己而人安百姓安弟嘗謂若視他人一分可忽便是自己一分學力未到此語諒不悖聖賢修己之旨蓋聖賢實見人之于我此心同此理同吾無可驕於彼彼無可爲我忽也夫婦之愚不肖可以與知與能及其至也雖聖人亦有所不知不能夫又可忽乎哉夫又可忽乎哉狎侮之心畢竟起於忽人忽人之心畢竟起於不自修未見自修之至而猶忽人者也此允恭克讓所以爲堯之德溫恭允塞所以爲舜之德也忽人亦有二故一則以自矜而忽之一則以非人而忽之吾兄檢身若弗及寧復自矜然吾而智則易見人之愚吾而賢則易



見人之不肯吾兄負絕世之識抗曠古之操凡至乎前者智且失其爲智賢且失其爲賢而况乎愚不肯在彼猶自灼見分量無可遁藏而况吾兄之超然玄覽乎其不然而以高臨下君子所戒所以見人之非亦繇于不能自忘于善但比傲然自得者爲有聞耳二者皆學道之障害此須直下斬截如操鋒鋒利鏗更不可犯乃見學力竊觀吾兄之意又欲先得乎道以爲之主而後可以言學此猶徃於泰禪學佛者之見若聖賢之道則不離乎事事物物即事事物物而道在即事事物物而學在苟欲先得乎道而後言學則離道與事物而二之亦析學與道而二之矣朱子曰人須是博學審問慎思明辨篤行然後可到簡易地位若先以簡易存心便入異端去惟於事物而見其簡易故雖應天下之事接天下之物而不覺其煩難若舍事物而求其簡易則苟應一事接一物便覺煩難不勝紛錯此弟所以謂禪學與聖學絕不相同而吾兄亦既驗之而有見者矣若謂學無把柄但深探六經四子之書而把柄在焉吾兄之所以憂無把柄者亦坐既知復蹈旋悔旋犯故耳則弟所謂聖賢之學無過一敬者正乃把柄之所在也以敬而學學安得不博以敬而問問安得不審以敬而思思安得不慎以敬而辨辨安得不明以敬而行行安得不篤以敬而與人接物與人接物安得不盡其道敬猶長堤巨防防之密也滴水不漏敬之至也毫髮無尤故一敬而天下之理得天下之能事畢變通鼓舞盡利盡神希聖希天之學盡在於是程子謂敬乃徹上徹下之道者正以此也然此亦就弟鄙見云然未知當否伏望條其得失而明以教我若弟於力行則猶未有得觸處過端怨艾聚生嘗自

數念同志者寡輔仁無徒非吾昭法其誰與歸此番入山見吾兄勇  
猛精進壯志無前不勝慶幸願吾兄惕之勉之又堅持之即以前所自  
惕勉者倡我於前又以所自堅持者翼我於後幸後之日相與有成  
庶上以仰承先志下以不虛此生亦不負吾兩人生而同時同地同  
志同道無齒莖滅裂半塗自廢而為異端曲學所笑以後音問往來  
務各言其所得交勉其所不逮亦無為徒相贊許近于標榜者之所  
為稽祝禱祝  
懇切懇切

### 答退翁老和尚書

昨承法諭謂枋處人子之難得盡人子之道可以爲  
千古人子之法獎譽過分夫豈敢當惶悚惶悚復示  
周儀部玉鳧先生談笑辭世而和尚謂故臣遺老當  
此之時談笑而逝似不相宜謹哉言乎此千古所未  
發實千古所未曾見及也天地之內不可無此語然  
愚以爲死生之際人所難言根器不齊識趣各異要

未可一律而論當審其人生平所自持以觀其臨命一息之表見苟其人而真忠臣真孝子真聖賢佛祖則臨命之頃啼笑俱優如其不然笑固不可期哭亦未爲得也如曹瞞分香賣屨千古笑罵其鄙褻復爲後人勘破此正阿瞞以欺天下後世謂其無心於漢祚耳此言一出其惡愈甚嗟乎於此可見苟生平如瞞則當其死時悲喜語默無一而可矣周儀部天真粹白瑜不掩瑕忠孝皆本自然胸中絕無一物非末世矜持名跡以行仁義者比寔未知其易簣時果復何如若誠如尊諭意者以二十五年倖生爲憾而今而後始得灑然從吾君於地下遂听然而笑乎抑或

以二十五年之久而猶能不失其身猶得見吾故君而無愧因含笑入地也且至性之士哀樂過人嘗有笑而悲恨甚于哭泣者古人往往見之要未可一律而論也故愚意死生之際人所難言當就其人生平而論之耳未知和尚以爲何如至文章一道不朽盛事亦未易言而大要可指有無定之法有不易之體惟其無定故千變萬化而不窮惟其不易故觸緒縱心而必歸控馭如鉅冶然金鐵既鎔惟意所命儻忽傾寫鐘鼎斯成而鼎不訛鐘鐘不濫鼎無定之法不易之體具在是矣而近世不察多失其宗言法者病之於泥不言法者病之於疎而文章之道幾爲不開

之茅徑矣承示古無定體非無定體也風氣有殊也譬如古者茅茨土階而今者金門玉堂奢儉美惡亦已懸絕矣而上棟下宇其體豈變哉又示詩宗漢魏漢魏以前無漢魏其宗六朝三唐亦然愚意惟其無前所以爲宗也譬如佛法拈華之前豈必復有拈華少室之前何嘗復有少室但今之人惟知求漢魏而不知求其所以爲漢魏但知求六朝三唐而不知求其所以爲六朝三唐是病在不知其所以宗而非宗之過也昌黎云惟陳言之務去又云惟古于辭必已出吾亦謂苟造其極何必古人真能叙事便是馬班真能修辭便是檀左真能訓辭深厚便是典謨真能

詠歌盛德便是雅頌亦何法之可循而不知真能叙  
事必合馬班真能修辭必合檀左真能訓辭深厚詠  
歌盛德必合典謨雅頌何也是實有不易之體古人  
已立其極而吾不能出其範圍也杜少陵句有云未  
及前賢遽相祖述不有其體復何祖述哉然是求之  
學與道而非求之文章之法與體也深造於學自得  
其道則有無體之體無法之法不假繩墨自中規矩  
不循陳筴自合古人游刃運斤無所不可矣復承以  
禪論文如曹山不借臨濟無依雲門開機惟能不借  
斯成至文誠至論矣愚則更謂真能不借則盡借而  
無害真能無依則重依而無累真能開機則循門守

轍而自成機軸矣故惟太史公可以盡借國策世本  
惟蘭臺可以盡借史記盡借國策世本而不貶其爲  
史記盡借史記而無累其爲漢書蓋惟能盡借而無  
害方成其爲真不借也未知和尚以爲何如忽承垂  
教發此狂言汗漫支離竦罪竦罪

與堯峰月涵和尚書

豐山有石鐘霜既降則鳴蓋有其具得其地遇其時  
則不能已於聲也他山之石雖和霜而不能鳴豐之  
鐘非霜降而亦不能鳴何者三者不能相并也維人  
尤然此阮嗣宗所以有廣武之歎而桓宣武所以有  
平乘之悲也今以吾道兄著作非常之才臨三楚憑

弔之地而當今俯仰流連之時而登山臨水而遇物  
寫懷有不著書克棟者吾不信也雖或今者現身法  
王息心道要舉今古塊壘文章結習一掃而空之然  
愚以爲真意所寄正自不妨一存本色不然讀哀郢  
之篇歌弔屈之賦攬衡湘雲夢之奇擷幽蘭騫芳杜  
吾道足其何以爲情乎老和尚行後不特弟一人無  
所歸依舉三吳同人如赤子之離慈母故亟望老和  
尚速鼓慈棹即賦歸來也惟吾兄力勸駕焉自春而  
夏而秋計道履勝善珍重不宣

與寶安去息和尚書

名居漢靈巖嗣爲余族兄

兩年不侍慈顏不得音問中心怒如有懷莫寫惟時



從梁溪友人口中問訊道履平安耳前知吾兄已謝院事退居一淨室中此時遠避塵俗稀簡應酬淡爲得宜雖曰道人具菩薩心以救世爲亟然時節因緣固有以不救世爲救世者此中尤須簡別弟嘗云聖賢窮則獨善其身然獨善而默持百世之風教則其兼善愈大而非末世以身殉物者可藉口達節矣

與葛瑞五書

昔人云借書一癡借人書一癡索書一癡以吾觀之天下事寧獨以此爲癡哉凡嗜之膠於心而物不能解者皆癡也當其專心致志舉吾之身無非是者故饑寒不能慘吾體憂患不能動吾心舉天下之美好

不足以易吾欲而其所成亦遂以名天下而不腐於後世昔人有嗜奕者每旦甫開曉仰而視其帷之頂則有枰焉於是指點目瞬首肯而口囁嚅者皆殺活爭刦之勢也嘗與友賭棋不勝心不服僂行而密算之遂觸危石而仆碎首而殞焉夜半人救之始甦苟無救亦竟以死矣噫何其癡也而其奕亦遂以無敵于天下故如鍾繇學書嘔血破塚米顛乞帖發狂投水非癡之極則亦不能精之至也不獨此也湯武之放弑劉項之所爭奪以巢許之高及老莊之齊得喪同視之寧不爲癡哉而究之巢許之磴磴必洗其耳老莊之矻矻著書以必申其說亦未爲不癡也以吾

觀之古今之人不癡者何限而足以名天下而不腐  
於後世者必癡者也惟其癡愈甚則其詣愈極而其  
傳愈遠嗟乎當今天下非吾與兄其誰能癡哉昔蔡  
邕一見王粲盡以書籍與之此亦癡也沈約賞王筠  
之文劉顯推孔奐之博識出藏書相付此亦癡也劉  
孝標好學聞人有異書必往祈借此亦癡也袁峻家  
貧無書每從人假借鈔寫此亦癡也何也人之有才  
與我何預而畀之藏書一人心目之力寧能盡天下  
之書而祈借鈔寫哉然今唯兄能爲邕與約與顯而  
吾獨能爲孝標與峻故吾願吾二人者循環於三癡  
之中而已

與靈巖曇應和尚書

名文果退明老人嗣

風波之世鬪諍之交誓不欲以此身一涉其間故今不特欲口絕譏評亦并欲口無讚歎恐一有讚歎則又爲不讚歎者生嗔耳如何如何此語并可一呈老人使一開笑口且以見不肖之所存也如何如何

與王雙白書

張默全先生藥囊擅和扁之術蓮社推宗雷之賢名滿三吳者三十年矣此固吾三吳薦紳先生所稔聞也而其內行純備孝友大節不愧古人實人所未盡知者近復讓數千金之產如棄敝屣去戶屢常滿之業如脫塵垢盡以與其弟而予身入山隱跡僧舍不

攜一童豎不應一世緣一室蕭然閉戶獨坐令人可望而不可即此其高風不尤古人所少哉不肖弟爲乞同志數人爲詠入山詩以贈之意必求當世鉅公而且志在山林者如高彙旃學憲馬爾采國博得推分贈言然後足垂不朽矣枋二十年土室薇蕨不繼且一家善病默老以參苓珍藥起之而且載酒問奇絕甘分少有古人之風吾心竊感之亦心竊高之此固左右之所目見而讚歎無已者也枋鄙瑣無似然素性硜硜不敢妄爲許與居常竊論交情自交情人品自人品不可以愛憎德怨絲毫夾雜若默老盛德實愧未盡形容非敢阿私所好也若彼虛憍浮慕盜

譽標名者吾去之惟恐不速又敢從而妄諛之哉

與王生書

僕自滄桑以來二十餘年絕不刻一詩一文所以者  
何避世之人淡不欲此姓名復播人間也則僕之傭  
書賣畫豈得已哉僕之傭書賣畫實即古人之捆屨  
織席聊以苟全非敢以此稍通世路之一綫也而足  
下每每強僕以書字母乃與僕之初心大刺謬乎况  
僕之不書字亦正以苟全也心之精微口不能言豈  
易一二爲足下道哉乃僕辭之甚苦而足下猶必絮  
言其人若何品行若何家世不妨爲書字噫何足下  
之難曉如是乎豈僕之有所揀擇簡傲而云然乎噫

亦謬甚矣僕嘗謂索僕書畫而必強僕以書字亦猶于茹素之人而必強進以魚肉既已謬矣及其堅辭而猶盛言魚肉之可食不更大謬乎承委種種并厚幣一一完璧鄙人硜硜苟非吾意雖千金所不欲也以足下之難曉也故特以書報

與朱致一書

附答書

表弟徐枋頓首奉書於致一大表兄尊前不肖弟自十六歲執經先師朝夕受教於先師者五年師嚴道尊耳提面命其切我以義而薰我以德實有古人之所少者實有稱說之所不能及者即今不肖弟稍知所自立又孰非五年中正其始之所造就乎弟故自

成童以迄白首服師之訓而佩師之德如一日也乙酉之變先公畢節於前先師殉難於後繼彭咸而遊汨羅又復一揆不肖弟痛之異之每一念至痛絕心肝必期有以寫吾心者時即矢意爲先師作一傳欲俟於文事稍有闕見然後爲之及執簡而受役於同人亦有年所豈反遺我初心哉第甫叙疇曩百端交集伸紙欲書而悲來輟翰者不知其幾矣今以衰病浸尋不欲更稽奮腕操觚努力從事爲叅詳節概裁酌巨細勒成一篇繕寫淨本專函呈上雖心似踐而精已銷亡無有健筆雄辭可以耀日星之輝而炳川嶽之靈者則又終無以極吾心之所存也如何如何



# 惶悚惶悚謹東向再拜枋手白

表弟用純頓首頓首謹復侯齋老表兄尊前伏蒙高誼爲先人撰傳見示兼拜手教懇懇備至恭讀迴環感而繼泣泣而且愧嘗論弟子受業於其師得以行成德立者雖曰淵源有自陶鑄有資亦由天挺人才其精神志慮自有以奮興而遠到也惟其才之偉傑爲與道親故其於師門之一言一動一步一趨皆有以得其指趣而受其裁成古來聖賢所謂見知聞知皆是道也不然則雖日遊鄒魯之門牆日依闥雖之几席亦何自而知其所以爲孔孟所以爲程朱也哉而其所得於師門者復有以身著之以言顯之之不同顏曾之在孔門奉無隱之傳不言之教神明默成以馴造道之極致而不聞頌揚孔子之爲聖何如其至又何如其大此所謂以身著之也而孟子謂智足以知聖者則皆曰汗不阿私所好雖有若干貢宰我三子之德行若不逮夫顏曾而其差言孔子則亦未有若是精實至當者恭惟老表兄執經先人之日用純尚在童蒙顚亦嘗廁處其間竊見吾侯齋篤信之思固已與諸從遊者有別維時侯齋科名甚早志氣甚盛方謂大其師承者在乎經國家而利民人不謂先人旋踵尊先公之從痛從彭咸遺則而吾侯齋亦遂屏居土室抑何不幸然而四十年來履非常之危遇歷百折而不同同於一日則於師門之所承傳亦既身著之矣雖始也入奉趨庭之命而又出聆函丈之誨既也內懷偉元攀栢之痛而又外深端木築室之悲然自非天挺人才自以其身維繫千古之綱常羣倫之名教亦安能在三之際盡孝盡義若茲也即

不復以其文爲先人揚芳播烈而後世皆知侯齋徐先生爲節孝朱先生弟子其於先人爲有光而滋重也多矣况復舉先人一生綱紀布列彙而爲傳則是身著言顯一人兼之以先人之名德大節或不負乎斯文用純則何幸而邀此榮施蓋自顧不肖勿聞嚴訓又得以中表子弟仰觀尊先公大君子之末光而且蒙先人之澤與吾侯齋契誼深厚垂五十載然而悠悠畢生無所振奮即比於沒溺塵溺者差若有間然不過朽株枯木同爲腐廢既不能以行諸身者發揮先人之遺緒又不能以其言導揚萬一能無媿歟若夫銜戢之忱充溢五內子瞻謂多言何足爲謝你祈昭悉不宣

居易堂集卷之二終